

ЎЗБЕКИСТОН РЕСПУБЛИКАСИ НОМИДАН ҲАЛ ҚИЛУВ ҚАРОРИ

Наманган шаҳри

2024 йил 5 январь

Наманган туманлараро иқтисодий судининг судьяси Б.Т.Мадрахимовнинг раислигида, судья ёрдамчиси Х.Абдулбориевнинг суд мажлиси котиблигида, аризачи АААнинг жавобгар БББ масъулияти чекланган жамиятига нисбатан молиявий жарима қўллаш тўғрисидаги аризаси бўйича қўзғатилган ишни аризачи вакили Т.Домулажонов (ишончномага асосан)нинг иштирокида суднинг ўз биносида бўлиб ўтган очик суд мажлисида кўриб чиқиб, қуйидагиларни

аниқлади:

ААА (бундан буён матнда аризачи деб юритилади) судга ариза билан мурожаат қилиб, БББ масъулияти чекланган жамияти (бундан буён матнда жавобгар деб юритилади)га нисбатан Ўзбекистон Республикаси Вазирлар Маҳкамасининг 2020 йил 14 майдаги “Ўзбекистон Республикасида ташқи савдо операциялари мониторингини янада такомиллаштириш чора-тадбирлари тўғрисида”ги 283-сонли қарорига асосан 22104144 сўм миқдорида (5 фоиз) молиявий жарима қўллаб беришни сўраган.

Суд муҳокамасида аризачи вакили ташқи савдо операциялари бўйича дебитор қарздорлик тўлиқ бартараф этилганлигини маълум қилди.

Жавобгар белгиланган тартибда суд муҳокамасининг вақти ва жойи тўғрисида хабардор қилинган бўлсада, суд мажлисида вакил иштирокини таъминламади ҳамда ариза талаби юзасидан ўз фикр ва мулоҳазаларини билдирмади.

Ўзбекистон Республикаси Иқтисодий процессуал кодексининг 128, 170, 220-моддаларида бундай ҳолда иш жавобгарнинг йўқлигида ҳал қилиниши мумкинлиги белгиланган. Шунга асосан, суд мазкур ишни жавобгарнинг иштирокисиз кўриб чиқиш мумкин, деб ҳисоблайди.

Суд аризачи вакилининг суд мажлисида берган тушунтиришларини тинглаб, ишдаги тўпланган далилларни текшириб, уларга баҳо бериб, қуйидаги асосларга кўра аризани қаноатлантиришни рад этиш ҳақидаги хулосага келди.

Ўзбекистон Республикаси Вазирлар Маҳкамасининг 2020 йил 14 майдаги 283-сонли қарори билан тасдиқланган Ташқи савдо операциялари амалга оширилиши мониторингини олиб бориш ва назорат қилиш тартиби тўғрисидаги низом (бундан буён матнда Низом деб юритилади)нинг 23-бандига мувофиқ, товарларни республикага олиб кириш ва “эркин муомалага чиқариш (импорт)” божхона режимига расмийлаштириш, шунингдек, ишларни бажариш ёки хизматларни кўрсатиш ёхуд улар учун тўланган пул маблағларини қайтариш муддати



импорт контрактлари бўйича тўлов амалга оширилган кундан бошлаб 180 кундан ортиқ бўлмаслиги керак.

Жавобгарнинг 19.10.2022 йилдаги YIWU/20102022-сонли ва 22.07.2022 йилдаги МУТ47500-сонли импорт шартномалари бўйича жами 36000 АҚШ доллари дебитор қарздорлиги вужудга келган.

Бироқ, суд мажлисига қадар жавобгар томонидан ташқи савдо операциялари бўйича қарздорлик тўлиқ бартараф этилган.

Низом 28-бандининг ўнинчи қисмида аризада кўрсатилган ташқи савдо контрактлари бўйича тўлиқ миқдорда валюта маблағларининг тушиши ёки товарларнинг республикага олиб кирилиши ҳамда “эркин муомалага чиқариш (импорт)” божхона режимида расмийлаштирилиши, ишлар бажарилиши ва хизматлар кўрсатилиши таъминланган тақдирда жарима қўллаш масаласи судда кўриб чиқиладиган пайтда — аризани қаноатлантириш рад этилиши назарда тутилган.

Ушбу ҳолатда ташқи савдо контрактлари бўйича товарларнинг республикага олиб кирилиши ҳамда “эркин муомалага чиқариш (импорт)” божхона режимида расмийлаштирилиши таъминланганлиги сабабли суд аризани қаноатлантиришни рад этишни лозим деб ҳисоблайди.

Ўзбекистон Республикаси Иқтисодий процессуал кодекси 118-моддасининг биринчи қисмига мувофиқ, суд харажатлари ишда иштирок этувчи шахсларнинг қаноатлантирилган даъво талаблари миқдорига мутаносиб равишда уларнинг зиммасига юклатилади.

“Давлат божи тўғрисида”ги Ўзбекистон Республикаси Қонуни 9-моддаси биринчи қисмининг 19-бандига асосан, аризачи ва жавобгар - ҳуқуқий таъсир чораларини қўллаш тўғрисидаги ишлар бўйича иқтисодий судларда давлат божини тўлашдан озод қилинган.

Шунга кўра, суд иш юзасидан давлат божи ундирмасликни ҳамда тўланган 33 000 сўм почта харажати жавобгардан аризачи фойдасига ундиришни лозим топди.

Юқоридагиларга асосан ҳамда Ўзбекистон Республикаси Иқтисодий процессуал кодексининг 118, 170, 176-179, 220-222-моддаларини қўллаб, суд

ҚАРОР ҚИЛДИ:

АААнинг аризаси қаноатлантириш рад этилсин.

БББ масъулияти чекланган жамиятидан ААА фойдасига 33000 сўм почта харажати ундирилсин.

Ҳал қилув қарори устидан у қабул қилинган кундан бошлаб ўн кунлик муддат ичида шу суд орқали Наманган вилоят судининг иқтисодий ишлар бўйича судлов ҳайъатига апелляция тартибида шикоят бериш (протест келтириш) мумкин.

Раислик қилувчи

Б.Т.Мадрахимов

